

Pisuussutiniq uumassusilinnik siunertaqarluartumik atorluaalluni inuussutissatigut imminut pilersornerulersinnaaneq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Karl Lyberth, Siumut)

Akissuteqaat:

Inuussutissat nunani allani tunisassiarineqartartut annertuut akisuullu annikillisinnaanissaannut nunatsinni inuussutissanik tunisassiorsinnaaneq periarfissaqarluartoq pillugu siunnersuuteqartoq Naalakkersuisut isumaqatigaat. Nammineq pilersornerulersinnaanermut immikkoortoq pillugu naalakkersuisooqatigiit isumaqatigiissutaat aamma innersuussutigisinnaavara.

Kalaalimeerniarfiit tuniniaasarnerat atuisartunut pilertortumik toqqaannartumillu kalaallit nerisassaataannik niuermik ammaassivissatut immikkut periarfissaalluarput. Inuussutissat isumannaassusiinik imaluunniit kalaalimeerniarfiit pisiniarfissuit nutaaliat tungaannut unammillersinnaanerat annikillisinnissaat isumaqatigiiffiginiangikkaluarlugit nakkutilliiffiit qanoq amerlatigisut ikilisinniarnissaat annertuumik oqimaaqatigiissaarineruvoq.

Taamaattumik “Maniitsumi najoqqutaq” malillugu Kalaalimeerniarfiit aaqqissuuteqqinnissai Naalakkersuisut tungaannit akuersaarneqarpoq.

Sammissami inatsit atuuttoq tassaavoq inuussutissanik sammisaqarneq pillugu Namminersornerullutik Oqartussat nalunaarutaat nr. 21, 27. juli 1998-imeersoq. Kalaalimeerniarfinni inuussutissanik niueruteqarneq pillugu § 26-mi nassuiaatigineqarpoq, aammattaaq aalajangersakkat eqquutsinneqarnissaat qulakkeerniarlugu kommunalbestyrelsip suliassarigaa.

Paragraffimi tassani nassuiaatigineqarpoq niueruteqarnermut isumaqatiginninniarnernut atatillugu suliareqqiinnisaaq inerteqqutaasoq, taamaallaat erisarneq, saliineq aamma uullineq eqqaassanngikkaanni. Tassa imaalluni panertulineq/nikkuliorneq, tarajorterineq, pujoorinneq il.il. akuerisaanngitsut. Inatsisip sularineqarnerani qulakkeerniarneqarpoq atuisartut inuussutissat toqunartoqarnissaannut illersorniarlugit, taama suliareqqiisarneq amerlanertut tamatuminnga aarlerinaateqartarsinnaammat. Eqqaamasariaqarpoq neqit kalaalimeerniarfinni tuniniarneqartut uumasut nakorsaaniit akuerineqartuunngimmata, taamaammallu nakkutigivinneqartuusarnatik.

Nalunaarummut nutaamut missiliummi naatsorsuutigineqarpoq inuussutissanik (aalisakkat aamma neqit) panertulinisaaq/nikkulisarneq akuerineqalissasoq, piumasaqaatilli aalajangersimasut malillugit.

Tuniniaasinnaaneq qulakkeerniarlugu, akitigullu pitsaasunik pilersuineq periarfissinniarlugu pisortat suliffeqarfiinut tuniniaasinnaaneq aamma akuerisaalissaaq, soorlu meeqqerivinnut, innarluutillit angerlarsimaffiinnut, napparsimmavinnut kiisalu neriniartarfiinnut.

Kalaalimineerniarfinit tuniniaanerup saniatigut sumiiffikkaani inuussutissat pisiniarfissuarnut tuniniartarnissaat aamma periarfissaqalissaaq, soorlu Pisiffik imaluunniit Brugsen. Tamatumanili piunasaqaataassaaq kalaaliminernik pilersuisoq inuussutissanik suliffeqarfittut akuerisaasussaasoq. Piniartut akuersissummik taamaattumik pisaarnissaat periarfissinniarlugit Inuussutissarsiornermut Suliffeqarnermullu Naalackersuisoqarfik inatsimmik suliaqaleruttorpoq.

Puisit amiiginnarlugit neqaat tamakkerlugit igitsiinnartarnej pillugu inerteqqusiinissaaq immikkut maannangaaq periusissamik inatsisitigut iluarsineqarsimanngilaq. Naalackersuisulli tunngaviusumik isumaqarput nerineqarsinnaasumik eqqaasarneq pisariaqanngitsoq. Taamaammatt Aalisarnermut, Piniarnermut Nunalerinermullu Naalackersuisoqarfiup puisinniarnej pillugu nalunaarummik suliaqarput, uumasut allat ilutigalugit puisip tamaat atortarnissaa pillugu kaammattuutitaqartumik.

Inuussutissanilli unammillersinnaassuseqartumik tunisassiornissamut unamminartut annersaasa ilagivaa, pisuussutit pitsaasut katersornissaannut attaveqaatitigut unammillernartut.

Namminersorlutik sammisaqartut selskabillu pisuussutinik uumassusilinnik atorluanerunissaannik kaammattorniarlugit tapersorsorniarlugillu Naalackersuisut aallutaqarput, Tamanna ilaatigut pissaaq eqalussualerinerimik pilersaarut “the Greenland Company” pilersaarusiorneranut tunisassiornissaanullu inerisaaneranut tapiissuteqarnikkut, eqalussuup tamarmiusup toqqaannartumik atorluarnissaa siunertaralugu, taanna uumasutut ajoqutaasutut isigineqaraluartoq, sinerissap ilaani sumiiffinni ataasiakkaani qimminut nerukkaatissatut atornerqarluartuusoq.

Imminut pilersorneq inuussutissanillu tunisassiorneq Naalackersuisut Nunap Immikkoortuini ineriartortitsinissamut suliniutaannut aamma ilaassaaq.

Sammisaq pillugu soqutiginaatilimmik oqallinnissaaq matumuuna qilanaaraarput.